

Aruba Birdlife Conservation ta reta Zoetry Isla di Oro Aruba

ORANJESTAD - E desaroyado di proyecto Zoetry Isla di Oro den un comunicado di prensa Dialuna den e corant Bon Dia, a publica cu nan proyecto ta wordo sosteni pa comunidad di Aruba y pa tur NGO.

Den un comunicado di

prensa Aruba Birdlife Conservation (ABC) a indica cu nan a logra haya mas di 10.000 firma cu ta muestra lo contrario di locual Zoetry Isla di Oro ta bisa. Banda di esaki ABC tin prueba di 5 NGO, cu for di April 2016 ta opone nan mes contra e proyecto y a duna esaki di conoce na e desaroyado y na Gobierno di

Aruba. Den e comunicado di prensa di e desaroyado, e ta bisa cu e ta completamente transparente cu tur hende y cu e proyecto lo no causa daño na e mangelnan (mangrove). Al contrario, e desaroyado ta bisa cu e proyecto lo salba y proteha e mangelnan na Savaneta. Na Februari di 2013 Parlamento di Aruba na un

manera unanime a vota pa proteha e mangelnan y pa nan wordo declara como parti di Parke Nacional Arikok. Segun ABC, e proyecto di Isla di Oro no ta cuadra cu e deseonan di e instituto mas halto di Aruba su democracia. P'esey Aruba Birdlife Conservation ta reta e desaroyado Zoetry Isla di Oro

Aruba pa publica nan diseño final di e proyecto, pa asina di berdad tin transparencia pa pueblo di Aruba. Na e manera aki e desaroyadonan por haya un oportunidad real pa comproba cu nan lo no mishi cu e mangelnan. ABC ta reta e desaroyadonan tambe pa publica e rapport completo di e estudio riba e impacto riba medio ambiente (Environmental Impact Assessment Study), pa loke ta nan proyecto. □